

國

朝

詞

綜

國朝詞綜卷四十四

青浦王昶

黃景仁 十四首

黃易 二首

王復 七首

李旦華 五首

李德華 一首

汪如洋 二首

錢塘 二首

吳蔚光 十八首

錢棨 一首

余鵬飛 二首

余旻 一首

陳逢堯 一首

黃景仁 字仲則武進人貢生議叙州判未仕卒有竹眠詞二卷

點絳脣 春宵

宿酒初醒閒情似水和腸軟細雨三更簾外春陰捲
一樹梅花落向閒庭院無人管冷風過處點點春愁糝

又

瘦骨無情年年此際慊慊病小立風前討箇傷春信

淡月微雲作出春宵景斜還整斷無人處中字闌干影

醉花陰

春田

錦幕輕風吹又動放去惺忪夢生怕捲珠簾尺五春陰
壓得眉尖重滿院姊歸花外啼測測寒飈送昨日上
高樓南北東西芳草何曾空

蘇幕遮

雪初晴簾正捲未試春燈先把春衣澣第一番風須放
軟怯怯春魂萬一驚他轉 飲厭厭歌緩緩驀地思量
春近家鄉遠細栗柳芽枝上滿待爾春深把我離愁綰

小重山

壬辰三月晦日新安客舍

整整春光客底逢人隨波上下絮西東鶯啼草長雨濛
濛花事盡添倍暮城空 門巷落花中幾番尋不見舊
時蹤餞春筵散太匆匆簾捲處三十六遙峯

換巢鸞鳳

王述庵先生招集陶然亭

素景商飈正羈懷落漠病思蕭寥忽飛天外賞來赴酒
邊招羣公車蓋滿亭皋文雄談綺書狂飲豪非此會可

不負鳳城秋好 清眺山容情偏愛秋山耐得斜陽照
對酒能歌拈花解笑未損年時懷抱吟情孤裊驀停杯
長天看得征鴻小歸鞍遲鞚角聲催度林杪

湘春夜月

竹簾

問何人并刀擘碎湘雲掩映綺閣銀櫳漠漠藻波紋界
上一絲絲月又幾絲花氣約住爐薰在軟紅十丈此間
清絕不到纖塵 昔游還記黃陵廟外青草湖濱細認
綠洲一段有未枯淚點不斷離魂晝長空地看模糊猶
帶烟痕斜捲處把水紋簾展楚辭讀罷如見夫君

沁園春

述庵先生齋頭消寒夜讌卽席賦呈二首

讀萬卷書從十年征歸來策勛有聞名破膽白狼青微
望風稽顙棘女髯君黔蜀烽銷西南埃一脫劍仍歸鵝
鷺羣承明暇拉一時燕許置酒論文長安車馬紛紛
只左擁尊彝右典墳算才還得福文昌司命知能兼勇
司馬行軍絕域功名熙朝往石天下蒼生望雨雲書
生意感牛心分炙白練題裙

又

久客京華落拓無成哈吁莫朝歎名場已醒夢中蕉鹿
酒徒難覓市上荆高冰柱如山雪花比席昨夜征衣換
濁醪塵土外但西山一角冷翠迢迢朝來寒竟須消

怪賤子何當折東招却幾歸幕底歌圓似豆一重門外
風利于刀顧曲心情當場意氣今日逢公頗自豪明朝
事任紆干雀凍鵲旦蟲號

燭影搖紅

燈花

驀地凝眸蟬紗減却銀缸亮裊成蘭氣不多些幻出花
花相深掩珠屏斗帳莫教他一絲風颺金錢罷擲碁子
停敲剪刀輕放莫是明朝青鸞有信堪凝望只愁今
夜似前宵刻意將人誑憎絕侍兒愁樣報聲聲粧臺斜
傍且挑香穗書就桃箋寄伊惆悵

御街行

十三夜偕少雲同步燈市

城東昨見青旗轉
陟撲面風情軟
玉簫吹起試燈人
門巷笑聲烘暖
六街拋得月華如練
今夜無人管
和君舊是清游伴
奈在事心頭滿
無情一片是春雲
隔得雨家天
遠星橋影墮
踏歌聲散
三歎歸空館

月華清

十五夜偕金棕亭王竹所集少雲法源寺寓齋因偕步燈市

絲麴搓成香蠶煮熟
招攜同話松院解事
靈妃早擁一輪天
半是今年初度逢
圓祝後會一樽常滿
行散愛流輝紫陌分
光翠殿莫道夜蛾心
懶被幾陣夜香暗中
勾轉似水車輪不遣
車中人見十分清露
下歌聲一例俊燈前
人面流玩算年華暢
好忍教輕換

摸魚子 歸鴉

倚柴門晚天無際昏鴉歸影如織分明小幅倪迂畫點
上米家顛墨看不得帶一片斜陽萬古傷心色暮寒蕭
浙似捲得風來還兼雨過催送小樓黑 曾相識誰傍
朱門貴宅上林誰更棲息幾叢枯木驚霜重我是歸飛
倦翮飛暫歇却好趁漁船小坐秋帆側舊巢應憶笑畫
角聲中暝烟堆裏多少未歸客

水調歌頭

題述庵先生三泖漁莊圖

一幅好東絹烟水熟空濛先生曾讀書處差許輞川同
閒覓釣師畧友共飽金齏玉膾樂事總無窮三面寫晴

柳九朶削遙峯　營門外馬背上直廬中時時一展圖
畫歸興滿吳淞已是文章千古又待功名萬里何暇思
秋風魚鳥莫相憶此意在天公

黃

易

字小松錢塘人監生官運河同知有小蓬萊閣詞一卷

買陂塘

馮戶部魚山所收橫波夫人畫蘭卷余見於都門攜歸欣賞爲填一闕以歸之

展吳綃乍疎還密芬芳幽谷清曉相如作賦無人買爭
乞美人香草隨意掃問楚雨湘雲叢裏添多少圖成一
笑怪紅杏尙書淋漓史筆却識數行小　湘蘭派合共
眉樓爭巧詞人誰不傾倒前朝金粉江流盡只有橫波
縈繞欣看飽悔不向晴窗索取親臨稿如君雅抱料得

見同時臂金解贈未肯讓朱老

用竹垞見夫人事

臺城路

題藝圃執經圖

幾年書劍隨征雁家園夢中春草陌上鞭絲江頭帆影
水驛山程不了開圖一笑羨靜笠閒鋤秫田青繞分饒
人攜一經奇字問多少 懽游長記嶺表越王臺上望
珠浦花早荔子紅嬌素馨雪艷不數山陰古道孤雲縹
緲又上谷香塵暗飄吟帽無恙柴門也思歸去好

王

復

字敦初號秋塍秀水人監生官偃
師縣知縣有晚晴軒藁入卷詞附

洞仙歌

花影

闌干幾曲被清輝移上疊疊重重靜搖漾怎游絲不惹

芳露難沾誰悟到豔冶都空色相
銀缸相背立小啟
蘭牕忽又迷離近羅幌懊惱隔低牆動處頻疑只誤了
玉人遙望便妙手崔徐也難描但細把張郎麗詞傳唱
花影迷離畫不成元人句也張先號張三影有雲破月
來花弄影句

又蝶夢

好春尋徧正花房香靜偷宿雙雙玉腰並料粉衣初褪
流扇輕離爭一晌栩栩游仙佳境
羅浮芳訊杳惜別
多時歸路依依遠難省此際畫樓人枕畔相思應同是
柔魂未醒急分付花鈴莫驚回聽金縷歌殘舊情重證
買陂塘

同人讌集湖舫黃小松爲作珠溪載酒圖
題詞其上

漾粼粼碧瑠璃淨斷霞紅映魚尾綠流畫舫移來緩休
把鴛鴦驚起簾影裡早銀蒜斜鉤淺露眉峯翠窗邊小
倚正新浴冰肌鬢雲重整一霎晚粧媚金尊畔宛轉
嬌喉欲試珠歌紅豆頻記芳心可識中藏苦笑擘青房
蓮子情似水盼一縷秋河翻怕添離思須教泥醉判坐
到宵深紅搖燭影涼露濕衣袂

憶舊游

同忍庵渡江晚泊京口感舊作

記年年幾度來往乘風雁影孤征又到新涼候恰一帆
安穩同棹歸船斷霞散空成綺落日遠山橫漸北固鐘
魚南徐燈火漏緊高城多情漫回首是雲黯遙天雪

酒長亭重覓停舟處刺蘼蕪滿地淒斷青青遙憶熏香
無寐紈扇感秋深正坐倚篷窗塔鈴獨語江月明

揚州慢

金棕亭招同閔玉井沙白岸汪對琴吳穀
人朱春橋汪秀峯吳並山汪劍潭何春緒
泛舟紅橋看黃葉

溝水流紅園林淒碧那禁一夜霜飛剩荒涼幾樹伴菊
影疎籬更裝點亭皋晚景滲金潑蠟低襯斜暉憶村莊
路遠蕭蕭空掩荆扉舊游人去奈回頭慘綠愁非縱
門豔無心耐寒有約飄墮誰依策策西風吹冷深杯勸
酒對鶯兒羨江南歸客燈前色映雙眉時穀人各各俱
將歸思
聲聲慢同人攜酒過述庵先生荷齋小集次韻

簾紋搖漾篆縷縈回碧雲凝住涼虛脆竹繁絲東山逸
興何殊清尊愛攜花下恰天風吹送仙飲音啞啞倩情
絲綰就一串明珠 感我青衫淚濕悔尋春較晚燕懶
鶯疎聽說懽情清宵繡被熏爐將離那堪持贈惜繁紅
委地如璣惆悵句試高吟敲缺唾壺

渡江雲 送嚴道甫歸金陵

東風纔幾日江南歸思早在玉樓邊灞亭分手處珍重
長途側側尙春寒白門楊柳想到時綠映絲鞭重灑掃
書堂幽寂牕列六朝山 新年歌袞倚翠畫燭圍紅數
追陪清讌無那又離觴滿泛醉不成歡深情盼取秋涼

候東閣啟舊榻猶懸探玉井更攀十丈青蓮

道甫有玉井攀蓮集

李旦華

字憲吉嘉興人貢生有青蓮館詞二卷

金縷曲

送朱春橋先生之揚州

庭鎖桐陰暮鎮相從茶烟碧裊雪窺花乳填罷新詞重
潑墨一幅貪摹嶺樹悵柔橈匆匆催去歌吹竹西應好
在記紅橋廿四留題處還細聽打窗雨閑園話別紛
離緒正勞勞津亭柳色也飛風絮寂寞吟編塵滿篋最
是梧溪倦旅輸此去金荃遙譜賺得二分無賴月有傷
春刻意樊川句應寄我遲鴻羽

西江月

翠被涼生枕簟銀釭影淡簾櫳可堪秋雨又秋風記不
分明殘夢四壁吟蟲俱歇聲聲只在梧桐醒來一似
最高峰萬頃松濤齊湧

解珮令

鑾箋輕擘篆香試炷甚探幽覓句情都倦一榻支頤慣
獨自梧桐庭院鎮相隨藥爐茶串小橋雁齒小船鴨
嘴負烟鄉漁竿釣線落日秋風誰問訊杜陵吟卷點空
階桂花如霰

賀新涼

秋夜

客夢清如許是良宵小簾輕衾乍披疎紵一霎吳檣飛

鳥提歷徧遙村小。淑訝入耳分明。鄉語江上。蓴鱸秋正。
好。悔年時不挂歸帆去。辜負了舊漁具。驚回好事。落
無據。恨空階吟蛩催斷。經年離緒。燭爇香微。人乍倦。况
是沈沈夜雨。渾不省銷魂何處。蚪箭三更。初盡也。却聲
聲聽到梧桐樹。且料理剪燈句。

摸魚子

雨

看稀疎短牆苔色。朝來鋪遍。庭砌楚峰當戶。叢叢直幻
出半簷雲氣。游倦矣。盼草樹連天未定。歸來計。楊絲剩
幾只。攀盡柔條沈沈極望。烟際畫樓閉。他鄉夢休把
音書遠寄。空階迷亂人意。淮流侵曉添新漲。那見討春

游騎堪恨是有狼籍殘紅滿地香雲膩閑窗假寐便一
霎吳檣瀟瀟聽到小院竹聲細

李德華

字可大嘉興人諸生

雙雙燕

得二兄書卻寄

客愁未醒歎天外飄零幾行飛鴈曲闌倚罷幸有尺書
風便笑拂封題乍展早減了離情一半眠食別後如何
怎奈同懷雲散誰伴苦吟都倦况芳草天涯歲華易
換相思無賴夢入謝家池館杜宇催人別院第一是分
離難慣何時料理歸帆花萼樓中相見

汪如洋

字潤民號雲壑秀水人乾隆四十五年賜進士第一官修撰有葆冲書屋集五卷詞附

揚州慢

詠芍藥用樊榭山房韻

門掩梨雲徑吹簫雪輕寒九十都銷對鶯忙蜨懶強與
殿芳韶想侵曉豐臺露泣箇人珠淚染徧鮫綃怕仙郎
薇省吟成也只無聊春嬉南浦記盈盈兒女情苗嘆
玉鏡臺邊紅闌砌畔水遠山迢贏得膽瓶斜插銀燈畔
酒暈偷描任濃斟藍尾來朝綠暗平橋

疎影

賦柳絮用樊榭山房絮影韻

尋芳夢遠正碧煙萬縷深鎖仙苑那處飛來片片撩人
湘紋過午慵掩灞橋多少分襟淚翻滴到伊行青眼又
惹他林下詩情記起撒鹽庭院搭徧闌干幾曲比晴

絲天半作態還軟乍去仍廻欲住難收笑我坐禪心懶
萍蹤別浦匆忙甚長杜宇斜陽催晚算不如蝶粉西園
留與綠陰爲伴

錢

塘

字禹美嘉定人乾隆四十五年進士官江寧府教授有玉葉詞一卷

八聲甘州

際長空草色漸如烟社燕又雙歸正柳雲婀娜梨雲明
媚江水初肥陰雨逡巡不下也解惜芬菲惹起閒情緒
蛺蝶飛飛客裏堂深晝永歎采蘭挑笋事事都非奈
暖風遲日如此好春時想幽閨垂簾人靜更近來瘦損
不勝衣盡日在闌干深處吟對薔薇

浣溪沙

一陣荷香遞笑聲
綠陰簾幙晚涼生
禿襟小袖絳紗輕
閨把宿茶澆茉莉
戲縫羅袋捉流螢
水晶簾外月初明

吳蔚光 字慈甫號竹橋昭文人乾隆四十五年進士官禮部主事有小湖田樂府十卷

西江月

對面繡棚坐處
比肩鈿檻行時
天涯萬縷麴塵絲
釀遍相思如水
幽夢却無枕覺
閒愁還怕鐙知
啄花社燕忒歸遲
又入盧家梁底

摸魚子 題張篋谷丈移家西湖圖

笑紛挐足躡手板幾多衰
衰華省誅茅早卜揚雄宅
最好西泠烟景容管領有
揉碧搓藍一幅明于鏡
鷺昏鷗暝向白傅堤腰
葛翁嶺腳妍唱寄三影
生綃滑絃出松坪梅町柴
扉開向沙徑海懷霞想黃
塵裏結隱那番纔定田二
頃更酒榼茶鐺載上瓜皮
艇引入入勝待燒筍雲林
采蓴月汴儂亦挂笭簖

又

汪秀峯招同方蒸砂坵堂李鑑川集盤門舟中

釣絲風綠楊堤腳吹來雲
水深處蓮軟藕葉何曾見
且向碧波心住秋太苦凭
蠡殼船窗猶賸九分暑酒
鱗茶乳被銀甲彈箏金釵
撼篷閣了夕陽去
柁樓外拋却

青山無數十眉樣
子新譜人生消受風流福
最是鏡前
爾汝相與語
只白髮青袍又作今宵聚
月香一縷
拚隔
座藏鉤分曹刻燭飽聽豆花雨

酷相思

金縷絲牽牽別緒
翠餽淺難教住
最惆悵江南寒食路
草綠也春歸去
水綠也人歸去
落盡梨花雙燕語
畫樓上瀟瀟雨
看天色一條催欲暮
草綠也春何處
水綠也人何處

百字令

寄伯兄

綠陰如水夢纔圓
小院孤蟬聲咽
十二湘簾渾不卷
心

字篆紋空結酒釀茶香懷人天末只悔輕離別相思書
札開函欲讀還歇遙想燕市捶琴金臺擊筑對風沙
愁絕射鴨撈蝦生計好休忘五湖明月自笑疎頑移花
蔣竹閑事都成癖江邨秋雨翦鎧留共君說

瑣窗寒

暮秋

月讓鎧青霜欺葉碧梧桐高閣金風似翦新雁一繩吹
落幾相猜故人書札甚難來水邨山郭料柴門吟瘦茶
烟羸得鬢絲如昨秋光休負却恰鱗螯肥也白酒初
熟菊花如客對清影破巾旋漉縱者番不醉千回怎耐
那檐牙敲玉待小春開了山梅重尋雞黍約

桂枝香 夜坐有懷

曲池疎樹見翠館涼初流螢無數冰簟橫陳消受荷香
風露銀缸落蕊紅于豆又文簫譜殘何處不堪回首香
消夢斷懷人無語 記往日麥風梅雨慣綠酒分曹紅
牋覓句一別經時空盼燕來鴻去晚潮得便拏孤艇好
共吐繭絲愁緒龜莼試采肥波薛濺月明同煮

臺城路 新市舟中紀遇

鶉鴝呼夢東風輕船唇繫來芳樹沙市烟暝江樓日潤
燕入湘簾鉤處雲鬢淺露正粉面初勻海棠含雨倚檻
盈盈華年數到玉笋柱 橫波無限春思恨錦帆荏苒

不教人住一抹遙峯半鉤早月依約絳仙眉嫵柔情萬
縷只淚逐楊花暗潮流去六六頰鱗玉牋誰寄與

摸魚子

題董眉峯孤篷聽雨圖

問人問海懷霞想芳盟誰狎鷗鷺飄然一舸攜書卷滴
盡五湖疎雨凌極浦只橘叟菱夫扣柁閒來去梳煙織
霧有碧柳條條青蘆葉葉天水渺如許伊人在仿佛
蒼兼白露吟湘賦楚誰訴對牀夢散千行淚雲外斷鴻
無數餘鬢縷便筍屐蕉衫勝踏東華土謝塘顧渚更酒
滴槽紅茶翻碗碧生事未遲暮

鵲橋仙

杏花開過桃花開過將近棟花開矣分明二十四番風
把無數暗愁吹起 綵毫慵搦珠簾嬾捲惟有小闌干
泥黃昏時節最傷春看滿地月華如水

瑤花慢

十一月初三對雪

窓明妒縞被冷憎綿吹滿長安雪遙天似幃剛寫出幾
點飢烏低咽街心巷尾喜悄審輭紅塵滅賺夢回籠袖
酸吟暗和隔牆殘笛 忍寒獨自巡檐笑人在冰壺山
骨清絕玉蘂瑤枝定愁到一樹小梅花折奚童輕掃留
照我畫簾眉月又無憀細撥熏鑪攪得相思難說

滿庭芳

永晝如年遙天似夢旅懷容易萎迷湘簾軸處飛燕一
雙低幾許蠶狂蝶浪花鈴底得意爭棲營巢苦杏林雨
歇何處好銜泥 濃春偏易謝蘭篝徒試蕉紙虛題已
彫闌凭煖日未斜西暗憶故鄉消夏真蕭灑竹町荷谿
長安樂不如歸去休待杜鵑嘑

臨江仙

樓上闌干閒倚徧暮天又近昏黃是誰偷學晚來妝月
梳山髻小風翦水裙長 相見時難偏別易千迴百折
柔腸可能拚箇不思量嬾描顰蛾睫怕繡睡鴛鴦

齊天樂

雁

正無聊小樓閒倚天邊飛到秋雁黃菊才開白蘋已老
寫出相思千點飢懷冷怨宛箏柱斜排乍彈重掩陣陣
行行高空猶恐弋人篡 銜蘆入關路遠幾飛鳴宿食
春暖方轉霜月三更水雲萬里叫得羈孤腸斷西風不
管其衰柳寒鴉一繩吹亂又落平沙夕陽紅處見

鵲橋仙

百花春草春雲春雨更是春風雙燕江南何處不相思
青容易九回腸斷 夢殘如月愁多似水獨上高樓難
見夕陽山外又青山人却比青山還遠

蝶戀花

粉蝶不知春已去獨自飛來猶傍花枝舞枝上花開餘
幾許荼蘼小折薔薇吐一角畫廊人立處最是情多
難向東風訴吹上滿衣新柳絮碧雲無盡天涯暮

攤破浣溪沙

早起慵描淺黛螺晚來喜捉小紈羅獨倚鴛鴦雙戲處
看風荷坐沒心情衣摺亂眠無氣力簾紋多浴罷一
鉤新月上夜如何

滿庭芳

細雨霑花輕雲護月長宵最是溫柔幾星螢火點出小
庭秋自倚闌干人別費相思還怕登樓新涼好紗幮寶

簾無睡待牽牛 悠悠真易老還同江水長向東流笑
難流將去疊恨重愁纔結片時春夢偏驚醒白玉簾鉤
偏凝佇瀟湘天遠幾筆畫屏幽

錢

榮

字湘舫長洲人乾隆四十六年進士自鄉
會試至廷試皆第一官至內閣學士

沁園春

題秦敦夫太史所藏汪蛟門比部少壯三
好圖

驀地思量明月簫聲別來幾年記邢溝燈火航船交錯
東山亭榭鼓吹喧闐老輩騷壇清時高會裙屐風流儘
可傳渾無賴把客嘲賓戲一例同編 畫圖好認飛仙
剛觸撥心情往事牽只百城坐擁輪他卓犖三杯勸進
少此嬋娟壯不如人客非無好蓬髻春風顧影憐傷憔悴

惇早懃除綺語怕寫蠻牋

余鵬飛

字伯扶懷寧人乾隆五十一年舉人有夢賤書屋詞一卷

浣溪沙

閨思

率地簾垂不卷花
熨香金斗漫烘霞
春陰寒較夜來些
纔諱言愁眉翠聚
整思尋夢徑紅遮
關心雙燕絮年華

桃源憶故人

見桃花遺興

小園一晌輕陰護
不省春深幾許人
面春風那處多少
黃鸝語
隔年情事當時悞
懶更輕拋詩句錦
浪扁舟來去臥看江南雨

余

旻

字秋農上元人貢生有羣玉山房詞

卜算子

雁用東坡韻

獨自倚南樓遠寺鐘初定樹杪疎星幾點寒掠過飛鴻
影風物又驚秋舊事回頭省夢斷江湖信又沉是處
蘆花冷

陳逢堯

字覬之南匯人諸生有華萃詞草

清平樂

吟香句裏多少愁滋味憔悴玉人眠未起鋪地月痕如
水幾番消息無憑曉風楊柳啼鶯驚碎一簾花影移
燈立盡銀屏

國朝詞綜卷四十五

青浦王昶纂

沈清瑞 十一首

王開沃 十一首

金德輿 一首

王陸禔 一首

王啟曾 一首

姚念曾 一首

吳志遠 二首

顧列星 三首

曾煜 一首

殷塏 一首

金式珪 一首

陳澤泰 四首

吳鈞 二首

吳友松 一首

錢青選 一首

徐應階 一首

沈信 一首

余鵬翀 一首

倪象占 四首

金翀 一首

王文潞 一首

王莊壽 一首

沈清瑞

字芷生長洲人乾隆五十二年進士有沈氏羣峯集詞一卷

玉樓春

春城一帶垂楊暝
淡日輕雲晴不定
杏花風細雨絲絲
隔水人家寒食近
歸來燕燕傳芳訊
斗帳熏鑪銀葉潤
今年春事去年心
飛絮多情上簾影

清平樂

鴛鴦眠盡湖水如圓鏡
笑入荷花風不定
畫槳劃開萍

影 短簫吹過紅橋柳陰陰處烟高歸去輕衫半濕橫
塘暮雨瀟瀟

又

篆烟飛盡香減春衫褪坐久玉人鈿雀冷柳外風吹髻
影 迢迢青粉牆高隔牆幾點櫻桃可惜今年花下更
無人伴吹簫

又

濕雲如夢水榭輕寒送坐雨畫屏秋氣重風起葦衣微
動 錦筵銀燭無光照人別淚成雙一曲鈿箏彈盡雁
聲今夜初長

臨江仙

暗水似隨鏡濕晚涼都傍衣生小樓今夜起秋聲星光
釵外動月豔臉邊橫設果庭中私語結璘案下低盟
佩聲燭影已三更沈香烟底坐雙髻笑吹笙

點絳脣

梨花

夢隔涼烟半簾月轉花陰午粉香吹度羅幕無重數
歸倚銀屏澹到無言處輕寒聚曉雲來去依約留春住
祝英臺近

蜀箋紅湘酒碧蘭燼夜燈落風約簾鉤秋色動羅幕可
憐花氣微涼茶烟欲歇有人倚暮寒池閣舞衣薄記

得抱月飄雲腰態瘦如削塵散歌樓冷落舊絃索幾番
燕燕歸遲綠陰似雨負攜手小窗佳約

齊天樂

丁酉暮春重過曉春塢花枝照人鶯聲滿
樹風景絕似舊游而扇影歌喉一時都盡
拈長短句題之西窗

闌干三面垂楊裏風吹一簾春色摘葉聽鶯衝香識燕
又到看花時節簫聲巷陌漫問訛牆東洗紅消息喚起
新愁斷腸人對畫屏立輕衫淚淹幾疊翠樽難共欸
孤負芳夕酒市燈疎歌樓塵靜前度俊游消歇來朝寒
食算誰倚春烟伴人吹笛尋夢無蹤冷香雙袖濕

疎影

水仙花

楚天霽雨有冷香似雪吹墮江浦客裏逢人過盡朝寒
粉痕偷浣芳露湘妃滴破冰綃淚空幾度凌波無語又
月中環珮歸來午夜寄愁何處漫倚東風淺笑天涯
春正遠幽思誰侶相約黃昏小簾疎簾掩映風鬟無數
畫屏人去留殘夢任化作香雲千縷奈醒時瘦影和烟
涼入隔花窻戶

翠樓吟 賦簾

却月春屏障雲金屋冰綃六尺偷剪參差垂繡戶稱斜
押幾雙銀蒜燒燈庭院蕩一片湘紋無風似卷花陰淺
夜涼吹入粉香千點人倦倚暖闌干便晚寒成陣難

侵裙茜小樓春色定妨却銜泥歸燕韓郎幽怨甚一縷
沉烟相思隔斷搗團扇那回曾記暗窺嬌面

東風第一枝

樓陰月淡巷曲花深燈火夜闌酒懷如許

灰樹藏橋香塵拂馬惜惜巷陌春霽低聲私祝東風扶
住俊游濃醉杏花影裏拚立盡空濛月地奈沉沉蓮漏
如年隔院玉笙初起漫吟徧酒香紅被空惹著一襟
芳思自憐歌散旗亭又趁燈疎柳市釵樓信杳問簾隙
玉人歸未願將心寄與冰蜨照到畫屏山底

王開沃

字子良太倉人諸生有妙林詞一卷

好事近

風約繡簾斜冷透紗窻輕碧一派怨梅傷柳是誰家橫
笛翠帷人去鳳鸞孤愁坐擁衾鐵留得淒涼伴我祇
舊時明月

相思引

晚從瓜洲渡江

瓜步秋殘艸樹凋夕陽催上木蘭橈布帆影裡蒼翠滴
金焦蘆荻當風搖故疊魚龍挾浪捲前朝更無商女
靜夜搗檀槽

清平樂

題瀟湘暮雨圖

依然極浦一片清秋雨漠漠水雲朝復暮中有楚魂來
去陽臺隔斷巫山丹楓暗落江干又是征鴻度也玉

簫錦瑟生寒

又

前宵夢好鬢影鬆多少却恨鐘聲如謝豹催得餘歡艸
艸今宵好夢無蹤淒涼燕子樓空二十四番來去多
情祇有春風

山花子

衰柳烟空落照斜半天寒色在啼鴉鴉外碧樓人獨倚
客天涯苔砌不生懷夢草夜燈空吐卜歸花怪底暗
蟲聲窸率打窻紗

柳梢青

唐詩卷四十五
王
獨客江皋踏青筵
野渡官橋燕外紅
肥鶯邊綠瘦纔
過花朝
花前倍覺無聊盼
不到雲鬟翠翹
一抹斜陽
三分流水腸斷歸橈

虞美人

綠楊枝外沉沉漏
迷迭消金獸
黃鶯打起不教啼
依舊徹明無夢到
遼西
擎杯索向花前醉
酒化相思
淚翠綃封罷
又潛傾灑
作一天紅雨濕春晴

鷓鴣天

相識東風又到家
去年天氣舊窗紗
萬條柳影都隨月
千種禽聲各爲花
金錯落
玉交加
踏青遊女競豪奢

有人深院鳴箏坐桂木猶紅點臂砂

桂木守官別名

浣溪沙

桃花

灼灼春嬌顰面華鶯邊紅雨燕邊霞
同時玉李遜天斜
流水一灣漁父岸暖風十日夢瓊家
花情濃似去年些

又 春盡

碧甃朝寒喚錦鳩闌風長雨似窮秋
惜春春去賸春愁
鶯語浪憑金鎖鎖花光虛倩玉鈎鈎
倚闌人在小紅樓

又

倒插犀簪蟬翠環吹來芳氣細如蘭春情不斷似連環
蛺蝶數雙圖出易鴛鴦一對繡成難杏花微雨瑣窗
寒

金德興

字雲莊桐鄉人監生官刑部主事有桐華館吟稿詞附

朝中措

題友人蒹葭深處填詞圖

范湖秋水繞門流池館愜清幽檻外幾叢蘆荻蕭蕭喚
起閒愁移宮換羽新聲倚徧合付歌喉唱到白蘋香
冷勝他紅杏枝頭

王陸禔

字介祉昭文人諸生有餐秀齋

眼兒嬌

絲絲烟雨罨橫塘東風碧草香梅花已雪桃花未放冷
落春光 凝眸不見紅襟燕無語暗迴腸知他去後可
會念著舊日雕梁

王啟會

字葆素
嘉興人

洞仙歌

送楊三樵之閩

驪歌催唱怪天涯遊侶因甚忽忽別衡宇記春宵翦燭
共話西牕渾不記此日重牽離緒 連朝風雨惡儘自
生愁何況消魂又如許君去訴聞江月色灘聲憶後夜
泊舟何處覓別後相思更何如先第一難堪酒闌人去

姚念曾

字友硯金山人貢生官
知縣有賜墨齋詞

一枝春

舟中紀所見

畫鷁圍香蔦驚回人在翠簾深處厭厭芳思淺量含春
無語東風解意巧颺出繡鴛金縷應自愛映水新妝一
片小桃紅聚柔腸定知何許奈低眸翦水幾番斜注
踏青倦矣散了天涯香絮料量心事算情重也難憑據
早和他紫燕盈盈掠波遠去

吳志遠

字毅哉江南華亭人
有粵游詞草一卷

卜算子

和竹垞先生韻

攬鏡不成粧盼去花如霧誰向蕭郎索素書傳到心頭
語鰕頰又而今衣薄還裝絮如豆殘燈未殺時却更

瀟瀟雨

菩薩蠻

尋思已誤當窗約粉痕和淚偷彈薄燕子故飛飛絮香
吹滿衣 湘裙新砑褶穩步金蓮葉無語轉身纔凝眸
花又開

顧列星

字樊渠秀水人諸生
有風雨閉門詞一卷

臨江仙

短夢半隨雞唱斷依依散盡行雲畫樓回首月如銀羅
衾已冷猶有未銷魂 青鳥幾曾啣遠訊空餘蝶化仙
裙悔將杯酒酹東君春風無賴吹長舊愁根

又

捲絮風狂簾不捲朱樓深閉歲蕤燕泥落盡水平隄無人
庭院中有淚雙垂玉杵蘅蕪空付夢胡麻飯好誰
貽王孫春盡不思歸萋萋芳草門外卽天涯

少年游

秋夜

銀河天外望頻賒漏鼓正三過露蟬凄心霜鴻弔影都
到小窻紗清宵寂寂留誰伴孤燭半條斜羅帳餘塵
曉風吹夢春已隔天涯

曾

煜

字亮工太倉人諸生
有破菴集六卷詞附

浣溪沙

臨水南枝暖欲花探春踏遍曲塘沙
枳籬茅舍幾人家
野店風微晴放鴿淺灘潮落晚撈蝦
殘陽紅漲一天霞

殷

塏

字元爽嘉定人諸生有索解軒詞一卷

眼兒媚

碧洗長空月又圓粧點早秋天
雲鬟簾底桃笙屏角玉
笛風前
如今情緒轉茫然孤館夜如年
一籬花影一
燈蛩語一枕愁眠

金式珪

字夔齋青浦人諸生有鳳棲山房集詞附

惜雙雙令

題侍史小影

春困牽情愁裏度香影裊東風吹去一向無歡緒曉雲
更逐瑤臺路鴻書遙寄懷難訴雙碧合前緣誰據好
夢知何處者邊空著相思樹

陳澤泰

字茹征上海人諸生
有春柳草堂詞一卷

點絳脣

咏柳

細瘦腰肢東風搓就黃金縷和烟拖雨藏得鶯兒語

一望青青總是章臺樹傷心處江南春去目送連天絮

蝶戀花

記得櫻桃花下住拂袖穠香引入屏山路酒釀燈昏香
炮處蝶魂杳杳迷春霧鸞管拋殘魚信阻一度春風

捲盡沾泥絮明月重來誰是主樓頭燕子雙飛去

青玉案

春風吹亂溪頭絮又老却黃鶯語門外驪駒聲最苦離
筵箏笛離亭烟樹總是人難住輕車不礙遺鞭路奈
冉冉隨雲去無那紅樓芳草暮繡屏香裏鳳燈深處聽
盡梨花雨

瑣窗寒

困蝶追風倦鶯啼雨一簾幽恨落盡紅梅又是梨雲成
陣悵韶光百五如梭畫堂人去餘香燼但憑欄盼望夕
陽山亂柳遮烟隱消損渾難問托中酒三分懨懨孤

閤十尺蛟綃總把淚痕偷印倩幾行歸鴈傳情東風吹
斷渾未準藉今宵一枕華胥夢裏通蘭訊

吳

鈞

字陶宰江南華亭人
布衣有鼠璞詞一卷

臨江仙

書劒飄零誰似我歲除尙繫扁舟湧金門外小瀛洲梅
花香裏手紉木棉裘南渡繁華渾一霎青山碧水常
留夕陽紅到酒家樓亂鴉千點中有古今愁

臺城路

河東君古鏡爲郡倅鄭公作鏡徑五寸許
背有詩云照日菱花出臨池滿月生官看
巾帽整妾映點妝成攬查初白金陵雜咏
知爲薜蘿舊物也

南朝舊事烟銷盡菱花似經殘雨綠暗春窗紅明曉閣

嘗伴絳雲同住龍蟠鳳翥把十指輕摩濕銀猶注忽憶
村莊夜山紅豆畫中樹臨池怎教月滿拚分鸞此後
芳意良苦溫嶠臺邊江郎髮白試照羞顏如許銅花膩
處悵玉貌貂蟬此中難鑄小字回文更吟腸斷句

吳友松

字秋鶴
秀水人

百字令

題尤二娛水西詞

小長蘆後問新聲海內幾人堪數似此才華真不放靜
志居中千古雨膩燈昏草薰風暖如聽囁囁語一編小
譜惹人無限愁緒那得斟酌橋邊綠波蘭槳蕩到春
濃處檢點錦囊三百調付與兩行箏柱月子灣灣風兒

細細醉也僊僊舞峭帆江上恁時同賦歸去

錢青選

字漱石
武進人

紅情

贈歌者細郎

量花較月有芳輝如此定誰堪
埒濯濯楊枝一種韶華
正清越驀地相逢婉婉檀暈展
笑橫雙靨最憐是未解
嬌憨薄醉玳筵側
低說畫簾隙趁晚風弄晴歌試白
雪紅牙乍憂昵我胡牀倚吹笛
曲罷梁塵微墮秋空淨
彩雲明滅便頃刻相思滿忍教小別

徐應階

字復堂元
和人諸生

百字令

送鳬鄉游西湖

執蘭吟罷怕匆匆過了春光難住看到南園芳草徧便有殘紅無數短屐纒攜孤篷乍放且向西冷去樽空人遠黯然榮我離緒記昔湖上題襟歡游如夢曾逐閒鷗侶此去烟鬟波作鏡爲問妝愁幾許嫩柳垂青曉鶯啼碧收入蘋洲譜蠻牋頻寫又添多少佳句

沈 信

字孚中鎮洋人諸生有虛楚詞鈔一卷

買陂塘

悵匆匆鴨頭波暖東風催送南浦陽關舊曲聽來慣怎比這回凄楚紅日暮看勸殘離筵波溜頻廻注芳情乍露是忍淚偷彈暗傳心諾無計欸留住蒲帆掛千里

迢迢客路吳雲回首何許清宵懷夢空懷却畢竟趾離
無據方悔悞悔負却紅薔刺臂湘裙處年時密緒付蕉
雨孤窻盈腔別恨反覆醴陵賦

余鵬翀

字少雲懷寧人諸
生有少雲詞一卷

玉樓春

獨夜

荒邨盡處多時立殘夜暗風吹冥色無僧古屋一燈青
落月平原千樹黑重來誰記江南客自繞蒼苔尋履
跡無端影墮碧溪邊一片寒蘆秋瑟瑟

倪象占

字九三象山人貢
生官嘉善縣訓導

望江南

春光好畫閣小橋邊日射菱絲搖鏡彩風催雁語遞箏絃相見是何年

又

春光好靜夜可憐生萬點香泥圍燕夢一枝燈穗聚蛙聲斜月又三更

生查子

秋江歸棹卷爲張秋輝作

昔日綠楊絲今日黃蘆絮日暮過橫塘夜泊知何處新月喜逢秋殘月愁當曙月下有鴛鴦兩兩分飛去秋時輝得斷絃信

眼兒嬌

尋夢尋春一色迷
凝望草萋萋曉煙愁散輕風愁蕩夕
照愁低蓮勾香印魂銷處獨有燕
九泥珠簾細雨晝
梁明月夜夜雙棲

金

翀字振之休寧人監生寓居錢塘早卒有吟紅閣詞鈔二卷

清平樂

夢中贈歌者鄧鑾

樽前花底多少相憐意
一曲驚鴉飛又起
小院月華如水
東風暗送歸潮淚
痕濕透鮫綃他日重來記取門
前第五紅橋

王文潞

字介人太倉人諸生早卒有義亭詞一卷

西江月

留別陸廷彥

幾卷芭蕉葉綠數枝芍藥花紅相逢醉白一樽同細說
昨宵殘夢纔是題襟草草那堪判袂匆匆恒春橋北
柳堤東明月歸帆風送恒春橋在三泖漁莊東

王莊靜

字椿齡清浦人諸生

青玉案

題秋夜校書圖

嫩涼庭院明蟾吐幸舊有青箱貯湯說曹倉兼杜庫總
憑巨眼魯魚帝虎多少相沿誤燭花影裡勤叅互賴
紅袖能相助却笑香山蠻與素柳腰櫻口風流似許但
令工歌舞

國朝詞綜卷四十五

國朝詞綜卷四十六

青浦王昶纂

冒襄一首

朱謐一首

王臣蓋一首

劉霖恒一首

歐陽德裕一首

吳啟思一首

敖獻一首

李際時一首

汪煥一首

宋慶長一首

許孫荃一首

何五雲一首

傅世堯一首

張恂一首

孫爾思一首

馬自雋一首

毛士儀 一首

董儒龍 一首

任映垣 一首

萬秋期 一首

陸鴻圖 一首

郭徵和 一首

蔣韶年 一首

西泠酒民 六首

蒿亭居士 一首

宏倫 三首

原詰 一首

高雲 一首

濟日 一首

繡鐵 一首

雲門僧 一首

西湖老僧 一首

余一淳 一首

上鑑 一首

冒襄

見倚聲初集

浣溪沙 春寒

翠被生寒寶篆斜銀荷半炷透窗紗舊時閒事記些些
懶向重幃鬆扣傾誰來隔院理琵琶自攜殘蠟照梅
花

朱 謐

見倚聲初集

蝶戀花 春暮

紫陌風光看又度芳草年年惹下愁無數輕暖輕寒三
月暮香車鬧遍西陵路 枝上苦梅剛豆許春色三分
半逐游絲去解下金鈴貪鳥語流鶯浴盡殘紅雨

王臣蓋

見倚聲初集

少年游

初秋

藤花浥露月穿棚促坐聽蛩鳴粉澤初消珠璫盡卸團
扇小風輕星橫銀漢光如浸城上報三更滿檻荷香
一庭梧影好夢未分明

劉霖恒

見倚聲初集

浣溪沙

倩得蕉陰步石欄空庭鶴小步珊珊幾回幽夢未全開
雨點無多敲夜靜烏啼一半送春殘澹寒生處怯衣
單

歐陽德榕

見古學指南集

長相思

雲蒼蒼樹蒼蒼雲樹蒼蒼獨雁翔秋來愁怎當
山茫茫水茫茫真見偏稀夢見長相思天一方

吳啟思

見東白堂詞選

望江南

江南憶春潤野烟和燕子不來知雨急梨花欲謝惜風
多酒醒奈情何

如夢令

欹枕畫樓天半簾外月華飛霰一陣曉鶯啼喚起杏花
零亂消遣消遣無奈夢同人散

敖 嚙

見別腸詞選

訴衷情

微風不盡捲輕霞
一帶水橫斜
喚起秋情無緒
長笛落誰家
疎竹影瘦蕉花
半窗紗
月來簾外
人在樓頭夢到天涯

李際時

見三台詞錄

賣花聲

寧川雨夜

幽寂夜牕空
冷雨酸風燈
魂黯淡不成紅
百斛閒愁無處賣
拚教填胸
難禁此宵中
遙想別從詩場酒陣
獨拋農門外亂山青
萬疊遮夢難通

汪 煥

見沈時棟詞選

一叢花

當年曾共木蘭橈。心事付春潮。題詩統扇垂楊下，重來處可記纖腰。銀漢雲遮玉樓，烟合無計問吹簫。閒情不奈漏迢迢。冷雨一燈消。幾時喚得東風轉，桃花影微度紅綃。卜盡金錢，憑將畫檻，空對美人蕉。

宋慶長

見瑤華集

眼兒嬌

春情

垂柳垂楊雨初晴。天氣近清明。飭簫吹徹鞦韆斜挂畫裏江城。玉人粧罷無心緒，嬌鳥隔窗鳴。殷勤看取花

國朝詩集卷四
穠香細畫永烟輕

許孫奎

見詩餘醉

浣溪沙

秋景

草色斜陽江上幽
西風蘆荻滿溪流
宜人清興是深秋
細細蟲聲黃葉路
蕭蕭花氣白蘋洲
碧雲天際晚
夷猶

何五雲

見詩餘醉

減字木蘭花

冬日咏梅

長安雪意冷骨間
心高自寄萼破枝橫
策筇敲詩野興生
離家隔歲爲問
窻前開也未吹徹
瓊簫愁說江村

驛路遙

傅世堯

見河南通志

臨江仙

大梁春興

春到夷門催草色
晝長風日悠悠
梁時明月朱陵邱
劫灰千載恨尊酒
百年愁似聽烏衣
談往事相將對語
枝頭興亡欲說又
還休書燈連夜雨
憑弔一登樓

張恂

見陝西通志

江城子

登華山

朝來爽氣畫圖中
石崖窮索垂龍避
世何深樓閣挂危
壑却到青柯坪上
路奇最絕與天通
仙人掌上許誰

同石脂濃水溶溶回首紅塵千丈聳芙蓉採取驚人詩
在否還搔首問蒼穹

孫爾思

見陝西通志

浣溪沙

春日游黃公柳堤

來往朱輪輾畫橋春雲靄靄水迢迢浪花深帶酒帘搖
青帝郊中烟一縷黃公堤上柳千條鶯兒又作磬人
嬌

馬自雋

見嚴州府志

滿江紅

偕友人游寶華洲

出郭餘閒早看徧富春山色喜此地潏洞孤嶼紅塵先

隔泛棹忽搖鷗鷺影傾杯正滴魚龍脊儘西湖千頃綠
煩襟風生腋談笑處楓林赤倡和處瓊華白見數椽
梵宇波痕猶積勝境好留住客住夕陽又見歸樵急約
明晨更探玉泉峯催游屐

毛士儀

見嚴州府志

青玉案

游小金山

高桅急槳青溪渡看百尺澄泓聚片石飛來飛不去凌
空駕壑苔封樹擁突兀中流柱僧房低亞通幽處夜
半鐘聲雜蛟語清境暫游添客緒重來須記高眠三伏
四面敲窓雨

董儒龍

見宜興縣志

念奴嬌

初夏渡太湖感舊

綠遍枝頭斷送了九十春光消息馬足紅塵飛盡處牛
背何人橫笛剗地長風排空濶浪中有扁舟立筆牀茶
竈五湖自署狂客 猶記初泛年時香綃粉袖偎傍粧
臺側三載離魂無覓處血淚愁腸消得細數繁華夢中
身爾醉後重浮白一彈別鶴萬山湖上凝碧

任映垣

見荆溪縣志

朝中措

南碕春游

勝游曾過梵王家春色正清華稚子頻移石獷女郎徧

採新茶 歸來傍晚青螺幾疊薄靄微遮回首鵲鳴
處沿山都放桃花

萬秋期

見荆溪縣志

玉女迎春慢

玉潭凝碧

山簇川迴蒼崖側
蘊蘊檜杉交倚下有靈邱百尺綠
薜清漣相際卧虹橫
砌似暗鎖一泓秋氣波紋如縠迎月
弄烟都做飛翠
玉人去也香蹤空留得舊日洗頭佳
地鶴駕知他恁處
想像凌虛游戲髣髴雲乾未怕尚有膏
凝脂膩岫影澄潭錯認晚粧螺髻

陸鴻圖

見西湖志

臨江仙

湖上

十二樓頭春事早
花間試買屠蘇
盈盈十五學當壚
可憐垂素手
不慣數青蚨
踏碎殘紅堤路滑
杖頭珍重
葫蘆東風吹雨過
平蕪欲尋逋老
約喚取醉翁扶

郭徵和

見竹垞小志

百字令

題竹垞圖

禁花看後覺軟紅
十丈浣衣如墨
放棹江關烟月
沙歸向梅花溪側
竹簟邀涼
茅簷趁曝
故事真堪憶
文章歐九後
身應是朱十
況此籜粉侵堤
萍香撲幔
舊屬芙蓉國
最好荷衣縫露葉
紫綬青綳收拾
小閣茶烟長蘆

醺舫儘有忘機客酒杯才放草堂書散千帙

蔣韶年

見虎阜志

少年游

真嫌墓

綵灰何處喚真真一簇小桃墳清梵飛來疎香裊處冷
盡舊泥裙芳魂恰傍幽曇地草色幾經春歌舞三生
烟花一夢持此問慈雲

西泠酒民

有酣酣詞
鈔一卷

龔南陔云酣酣子長短句一片傷心寄情
言外泥者昧者俱未易言

繡帶兒

金鬢小桃春愁鎖綠眉顰一種風情拋也偏倣別離人

何處芼蘿邨倚碧檻憶斷黃昏水雲沙草青楓白露
雨下銷魂

沙塞子

休將醺醺破愁城除非是常醉無醒空贏得夜闌人靜
淚轉盈盈 隔幃還剩小紅燈熒熒影斜照秦箏恁無
語沉檀添炷背立雲屏

謁金門

江樓

江樓晚帆影櫓聲爭亂剩得夕陽剛一線任風吹不見
燕子也應飛倦誤入誰家深院只有雙鷗眠水淺愁
人凝淚眼

蘇幕遮

寶釵橫鴛被小七尺鰕鬚涼入羅幃好庭院深深秋雨
間切切淒淒葉落梧桐老 麝煤殘爐篆香寒漏頻添
鼠出窺燈悄夢隔巫山魂不到玉枕紅綿淚濕無人曉

蝶戀花

秋日湖上

一片明湖歌舞舊景色蕭騷恁處堪回首波上殘荷堤
上柳秋山都被西風瘦 撲面黃塵吹滿袖寒入香林
賓雁來時候雲破窮陰纖月逗會須重醉當壚酒

翠鬪相思引

意外孤雁

寶瑟寒飛午夜霜誰憐隻影背虛窗
別懷無限夢不到

衡陽殘月如鉤偏著眼一燈似豆在愁腸那堪樓外陣陣叫淒涼

蒿亭居士

有醉墨詞三卷

減字木蘭花

春暮

啼鶯婉轉似惜落紅春不管但替花愁那管愁人白了頭
楊花榆莢攪亂春光九去八一分殘春及早花前醉幾巡

宏

倫

號孝均宜興人有泥絮詞

點絳脣

春陰

玉笛丁寧落梅滿地愁無主連宵風雨魂夢都無緒

野水平橋岸柳迷烟縷鶯無語花廊月廡一幅春寒譜
眼兒嬌

似水官衙夜無聊燭炮水沈消故山秋老天涯人去明
月今宵 來朝準趁吳娘棹燈火過虹橋松陵江口佔
船相並篷背吹簫

過秦樓

寂寞琴書蕭條僧舍正是晝長人倦桐陰小徑水墨長
廊一日幾同行徧休把往事思量剗地愁來重門難掩
自賓鴻一去關河千里夢遙人遠 還記得紅藕塘中
紫薇花下立罷暑微涼淺鳳團聲細鴨裏烟消客我簾

紋先展斜靠紅闌小亭茉莉香濃倩題紉扇歎雙魚信
杳忍見塵生筆硯

原

詰字放菴太倉
人有紅豆詞

桂枝香

寒蛩語細聽訴盡淒涼客心將碎不捲珠簾怕見月華
如水羈愁黯黯渾如醉爲悲秋一番憔悴碧天空濶盡
樓縹緲玉簫初起 昔曾向花間竹裏把卮浮白縞袖
凝翠自去瀛洲仙馭頓忘塵世而今諸盡愁滋味更休
說故人千里夜闌酒醒參橫斗轉最憐無寐

高

雲

盤山
寺僧

踏莎行

寄花影巷主

漏靜鐘鳴霜寒月冷羣陰剝盡春將醒滿腔碧血阿誰
知百年心事傳花影 去去留留潛潛等等高雲一樣
蹤無定玲瓏夢破玉壺中翻翻光映摩尼頂

濟

日

字句玆
號逸菴

錦纏道

夏日移舟消遣炎歊長晝小池中芙蕖如繡鴉鵲葉底
閒相候銜得游魚飛過蓬軒後 聽垂楊渡邊笙歌迭
奏綠陰陰山亭新構且科頭閒倚橋闌待熏風披拂吹
得波紋皺

繡鐵

赤棗子 汾水道中

烟外雨雨邊山啼盡鶯聲二月殘青粉墻陰人獨立茜
紅衫映杏花寒

雲門僧

柳塘詞話選本多以衲子女郎爲殿後然女郎
即易見衲子罕聞康熙初雲門一大僧枉過
柳塘留巫山一段雲詞則真韶秀絕倫之語
他如雲漢澹歸各有專刻月函亦有禪樂府
皆石門文字一流人也

巫山一段雲

竹杖穿花徑蘭橈渡柳村欹斜古寺白雲屯相對坐黃

昏 香篆消殘印霜花凍曉痕十年情事若爲論一笑
月臨軒

西湖老僧

查恂叔詞話茂州陳時若大牧最喜歡此詞
云武林一老僧所填點絳脣也忘其名余聞
之輒錄出往復咏嘆音調超絕噫此亦紅藍
老人之倚匹也

點絳脣

來往烟波此生自號西湖長輕風小槳盪出蘆花港

得意高歌夜靜聲偏朗無人賞自家拍掌唱徹千山響

余一淳

號體厓杭
州人羽士

好事近

入大滄山

一片石玲瓏身入洞天幾曲點起明明蘆火見如鴉鵲
蝠 琴牀丹竈跡依然雲冷不堪宿待覓素書歸去倩
稽康解讀

上

鑒 號輝宗
長洲人

少年游

一階新草碧痕輕紫幔怯風鈴粉妝玉靨爲誰消滅空
自撥秦箏 幾回夢裏尋芳訊花底憶生平半醒梨雲
朱簾靜悄獨聽畫眉聲

國朝詞綜卷四十六

國朝詞綜卷四十七

青浦王昶纂

徐燦十四首

朱中楣一首

吳文柔一首

顧貞立一首

柳是 一首

虞兆淑 一首

趙氏 一首

賀潔 一首

馮嫺 一首

侯承恩 九首

吳芳 一首

鍾筠 二首

顏繡琴 一首

葛宜 一首

章有湘 一首

吳森札 二首

張學雅 五首

喻 撚 一首

沈關關 一首

沈友琴 一首

沈御月 一首

徐

燦

字湘蘋長洲人陳之遴室有拙政園詩餘三卷

林下詞選湘蘋夫人善屬文兼精書畫詩餘得北宋風格絕去纖佻之習

如夢令

花似離顏紅少梅學愁心酸
早生怕子規聲啼綠庭前
芳草春老春老幾樹垂楊還裊

少年游

衰楊霜遍灞陵橋何物似前朝
夜來明月依然相照還

認楚宮腰 金尊半掩琵琶恨 舊譜爲誰調 翡翠樓前
胭脂井畔 魂與落花飄

憶秦娥 春歸

東風老起來 檢點殘紅少 殘紅少 一簾疎雨半庭烟草
燕鶯故故 將人惱 千聲萬語春歸了 春歸了 雙蛾誰
遣鏡痕愁小

踏莎行

芳草纔芽 梨花未雨 春魂已作天涯絮 晶簾宛轉爲誰
垂金衣飛上 櫻桃樹 故國茫茫扁舟何許 夕陽一片
江流去 碧雲猶疊 舊河山月痕休到深深處

浣溪沙

春歸

金斗香生繞畫簾
細風時拂兩眉尖
繡床針線幾曾添
數點落花紅寂寂
一庭芳草雨纖纖
不須春病也慙慙

臨江仙

不識秋來鏡裏個
中時見啼妝
碧波清露帶紅香
蓮心羞結多半是
空房
低閣垂楊罷舞窺
簾歸鴈成行夢
魂曾到水雲鄉
細風將雨一夜冷
銀塘

蝶戀花

刺紫殘紅能幾許
曉枕驚迴
無奈紛紛雨
雨過柳風吹

不住不吹愁去吹春去 莫怪東君分別遽鏡嬾釵慵
不是留春處嫩葉漸看成綠霧霎時又恐秋霜妬

風中柳

春到眉端還怕愁無著處問年華替誰爲主怨香零粉
待春來憐護被東風霎時催去 日望南雲難道夢歸
無據徧天涯亂紅如許絲絲垂柳帶恨舒千縷這番又
一簾梅雨

滿庭芳

寒夜別意

水點成冰離雲愁暮能禁幾陣淒風綺窗吟寂頻倚曲
闌東夢短宵長難寐聽不了點滴銅龍銷魂也梅花憔悴

悴飛雪斷來鴻
翠幃春乍透
鴛鴦香冷
兩地愁同只
天涯離別如此
匆匆爭奈多愁
多病無頭悶
一夜惺忪
風搖處
獸環雙控
銀燭影微紅

滿江紅 示四妹

碧海茗溪彈指又一年
離別看過眼
倦楊青老
怨桃紅
歇相約每期燈火夜相逢
長是葵榴月
倩殘燈喚起半
生愁
今宵說采蓮
沼香波咽
門草徑芳塵
絕痛烟蕪
何處舊家華闕
嬌小鳳毛堂
構遠飄零
蟬髻門楣子拂
銀燭譜向玉參差
聲聲血

又 將至京寄素庵

柳岸欹斜帆影外東風偏惡人未起旅愁先到曉寒時
作滿眼河山牽舊恨茫茫何處藏舟壑記玉簫金管振
中流今非昨春尙在衣襟薄鴻去盡書難託歎征途
憔悴病腰如削咫尺玉京人未見又還負卻朝來約料
殘更無語把青編愁孤酌

永遇樂

病中

翠帳春寒玉爐煙細病懷如許永晝恹恹黃昏悄悄金
博添愁炷薄倖楊花多情燕子時向瑣窗細語怨東風
一夕無端狼籍幾番紅雨曲曲闌干沉沉簾幙嫩草
王孫歸路短夢飛雲冷香侵珮別有傷心處半暖微寒

欲晴還雨消得許多愁
否春來也愁隨春長肯放春歸去

又舟中感舊

無恙桃花依然燕子春
景多別前度劉郎重來江令往事何堪說
逝水殘陽龍歸劍杳多少英雄淚血千古恨
河山如許豪華一瞬拋撇
白玉樓前黃金臺畔夜夜只留明月休笑垂楊而今金盡
穠李還銷歇
世事流雲人生飛絮都付斷猿悲咽
西山在愁容慘黛如共人悽切

水龍吟 春閨

隔花深處聞鶯鎖窗一霎東風驟濃陰侵幔飛紅堆砌
殿春時候送晚微寒將歸雙燕去來迤逗想永弦悽鶴
寶釵分鳳別時語無還有怕聽玉壺催漏滿珠簾月
和烟瘦微雲捲恨春波釀淚爲誰眉縐夢裏憐香燈前
顧影一番消受恰無聊問取花枝人長悶花愁否

朱中楣

字遠山吉水人李元鼎室

滿庭芳

花朝偕陳浣花君朱女琴士讌集熊姑母東湖草堂隨過杏花村舍風雨驟作而歸因訂尼庵之約

纔過春分又將寒食烟光處處空人欲邀僊侶選勝趁
芳辰尙卜陰晴未穩重游意兀自逡巡城南畔招提小

小桃李亦紛紛 閒評傷往事王孫草綠帝女花芬漸
苔侵古逕蒿滿閒門賸有方池碧漲凝情處樹古亭新
還惆悵踏青期阻微雨杏花邨

吳文柔

字昭質吳江人北鸞女弟

謁金門

寄漢槎兄塞外

情惻惻誰遣雁行南北慘淡雲迷關塞黑那知春草色
細雨花飛繡陌又是去年寒食啼斷子規無氣力欲
歸歸未得

顧貞立

字碧汾無錫人貞觀女弟

滿江紅

中秋旅泊

爲問嫦娥何事更一生耽閣也曾照曝衣樓畔長生殿
角伴我綺牕朱戶影孤他碧海青天約倩回風迢遞寄
愁心隨飄泊 五色管今閒卻千日酒誰斟酌又天涯
羈旅鬢絲零落別夢忽忽偏易醒遠書草草仍難託判
長眠憔悴過三秋人如削

柳 是

字如是嘉興人
歸虞山錢氏

金明池

咏寒柳

有恨寒潮無情殘照正是蕭蕭南浦更吹起霜條孤影
還記得舊時飛絮況晚來烟浪迷離見行客特地瘦腰
如舞總一種淒涼十分憔悴尙有燕臺佳句 春日釀

成秋日雨念疇昔風流暗傷如許縱饒有繞堤畫舫冷落盡水雲猶故念從前一點春風幾隔着重簾眉兒愁苦待約箇梅魂黃昏月澹與伊深憐低語

虞兆淑

字蓉城海鹽人有玉映樓詞

點絳脣

梅綻芳菲垂楊烟外低金縷韶華小住生怕廉纖雨

繡戶淒涼蝴蝶雙飛去愁如許夢魂無據還在秋千路

趙氏

錢塘人海鹽查容室

燭影搖紅

瑤瑟聲悲洞庭落木秋風急蘭旌桂棹水中央渺渺烟

波隔獨倚危樓百尺正黃昏長天一色汀沙月淡野戍
烽高寒山凝碧 雙鯉沉浮錦書三載無消息江南江
北折垂楊歷亂愁如織歲暮虛傳畫鵲浪花殘蓮歌寂
寂雲迷翠羽露冷瓊枝流光暗擲

賀

潔

字靚君丹陽人溧陽史
左臣室有文政堂詞

一翦梅

淡掃眉痕掩鏡匳花也慵拈香也慵拈倚闌終日病厭
厭風自開簾月自穿簾 一庭芳草綠鋪氈紅杏初酣
斑筍初尖玉堦微步望銀蟾花影纖纖柳影纖纖

馮

嫺

字又令錢唐人錢廷枚
室有和鳴集一卷詞附

國朝詩集卷四十一
滿江紅

和外送春韻

庭院深沉湘簾外餘芳還有凝望處遠山烟靄愁霖聲
又彤管漫吟消雨夜紫姑暗禱占晴晝問仙家經歲總
如春會歸否心已醉非關酒眉未展非同柳聽簷前
響滴令人詩瘦蝶伴蜂羣迷不出芳郊綺陌游難久惜
光陰滾滾似流波空孤負

侯承恩

字孝儀嘉定人有
益山詞鈔一卷

搗練子

春夢杳晚秋涼零落芙蓉尙有香人遠天涯紅日近斷
魂無語立斜陽

又

情脉脉思悠悠花自紛飛水自流青鳥不來春又盡含
愁無那倚妝樓

憶王孫

遠客長途孤寺秋天寒少箇寄書郵况兼風雨又綢繆
恨悠悠一點鳴牕一點愁

訴衷情

寄女史趙淑仙

難從弱水泛蘭舟悠悠無限愁天涯契濶空凝望此恨
幾時休星月小露華浮淚盈眸相思兩地芳魂不隔
夢繞高樓

西江月

天上繁星難數人間萬籟無聲忽聞清柝近三更月照
紗厨冷靜 若箇情深似海卻憐命薄如水吹噓何日
上青雲愁殺燈昏夢醒

浣溪沙

姹紫嫣紅風日佳心情擾擾似蜂衙安閑試問是誰家
花正妍時愁雨妬月當圓處被雲遮人間薄命不須
嗟

虞美人

春過九十餘芳草門掩經過少荼蘼架上暗香消尙有

深深蛺蝶趁風嬌 詩篇廢卻憐春去難買流年住小樓獨上覺淒涼只見一池荷淨浴鴛鴦

畫堂春

夕陽時候薄寒生依依獨自閒行一羣鴻雁帶愁聲飛過高城攬鏡暗傷憔悴背人偷落紅永畫橋西去是蓬瀛只隔雲程

一翦梅

無緒嚴妝獨倚樓愁在心頭愁在眉頭蓼花風起冷颼颼颼欲下簾鉤嬾下簾鉤百和香炷靜自浮琴也慵修書也慵修夕陽西墮水東流怕聽更籌又近更籌

吳芳

字芳英秀水人徐然室

阮郎歸

寄遠

東風吹就雨廉纖
慵將鍼線拈
暗愁多半上眉尖
殘燈和淚添
羅帳冷
髻鬟偏
無言且獨眠
欲憑清夢到君邊
誰知夢也慳

鍾

筠

字蕢若仁和人仲某室
有聚雲榭詩餘三卷

減字木蘭花

春曉

曉鶯破夢九十春光誰與共
望眼迷離粉蝶梨花一處飛
東風無力小院迴廊春寂寂
悄傍妝臺明鏡無端引恨來

浣溪沙 初夏

開到荼蘼花已殘，垂簾猶自怯春寒。困人時候雨連纖。
燕子將雛聲細細，荷錢雖小葉團團。一庭芳草綠如烟。

顏繡琴

字青音
吳縣人

長相思 憶葉昭齊表妹

思漫漫，恨漫漫。春色芳菲取次看。閒庭花影寒。
繞闌干，倚闌干。夢見雖多相見難。紅香泣夜殘。

葛

宐

字南有，海寧人。
有玉窗遺稿。

踏莎行

國朝詩林卷四十一
花撲重簾雲生遠樹倚樓望斷人歸路卻憐檻外雨和
風殘紅一夜飄無數新燕初飛乳鴉拂羽歸來已是
芳菲暮晝長漸近困人天春來春去傷心處

章有湘

字玉篴江
南華亭人

浣溪沙

旅懷

此夜難分怨曉鐘夢魂偏又到吳淞愁情先上兩眉峰
東
滄海一聲臨遠道蘭橈千里破長風可憐回首隔江

吳森札

字文照號蕭湘
居士吳江人

望江南

別情

人去也晚霽送行舟欲倩遠山留落日待登高閣怯新秋滿日是離愁

綺羅香

賦得願在衣而爲領

一幅蛟綃幾回忖量拈邵繡刀裁翦穩貼雙肩記把芙蓉扣掩綴珠翠顧影沉吟臨鏡面瘦痕羞歛漫尋春蝶眷蜂憐芳心猶恐舊香淺繡罷重封奩篋怕新來寬褪瓊酥銷減倦壓鴛衾蘭麝休教再染愁春去怨雨啼雲惜花殘香柔紅軟解羅衫閒熏熏籠甚心情更展

張學雅

字古什太原人張佚女流寓蘇州早卒

生查子

夢醒燭條斜何事頻添淚清夜正迢迢綠焰煎心碎
繡帳冷熏篝香膩鴛鴦被懶卸玉搔頭一束和衣睡

菩薩蠻

纖纖眉月窺簾小夜深人靜閒庭悄香袖倚欄杆玉階
花露寒 釧箏絃斷續懶奏歸雲曲微濕素牋紅燈前
帶淚封

蝶戀花

夜雨

門掩蒼苔春寂寂暮雨蕭蕭隔著窗兒滴小院黃昏人
獨立一雙飛鳥歸棲急 萬里瀟湘雲霧濕簾外風聲
疑是吹蘆荻腸斷梅花和淚泣還驚夜半高樓笛

又

紫燕雙飛春去了桃李枝頭留得春多少
簾箔重重人悄悄相思一半縈芳草
空憶故園歸去好正是池塘綠滿荷錢小
深院垂楊烟繚繞落紅荒榭啼鵲老

燭影搖紅

秋思

搖落江天一庭淡日間清晝素衣時怯曉風侵睡起籠
金獸病後東陽消瘦憑高幾度空回首籬邊疎菊天際
孤鴻年光依舊不解雙蛾偏將惱恨深深覆蓮房泣
露粉香愁池水風吹皺昨夜雨輕寒驟海棠滿砌胭脂
透暮蟬疎柳黃葉堆階斷腸時候

喻

撚

字惟倚吉水人侯鼎臣室

踏莎行

偕嫂游湖浦

畫閣妝餘東風正早且閒刀尺聽啼鳥湖鄉十里趁花
開凌波莫惜鞦韆頭小樹裏人家隄邊芳草遠山無數
橫天表頻年苦憶故園春今年始覺江南好

沈闕關

字宮音吳江人

臨江仙

春睡恹恹如中酒小庭閒步徘徊雨餘新綠徧蒼苔落
花驚鳥去飛絮捲愁來纔覺春來春已暮枝頭鼎鼎
青梅年光一瞬總堪哀浮雲隨水逝殘照上樓臺

沈友琴

字參符吳江人周
鉉室有靜閑居詞

浪淘沙

月下桃花

清露釀花烟皓魄無邊數枝低亞笑嫣然一自天台迷
路後辜負年年蟾影罩霞鮮似共流連茅齋相對恍
疑仙賺得東風今日好莫爲愁牽

沈御月

字纖阿吳江人皇甫
鵬室有空翠軒詞

虞美人影

送春和韻

送春春去添煩惱閒悶何時得了試看落紅多少點破
階前草流鶯樹上啼聲悄驚破羅幃夢杳斷送鏡中
人老都爲春歸早

國朝詞綜卷四十八

青浦王昶纂

葉宏綰

六首

顧瑤華

一首

閔懷英

一首

郁大山

一首

潘端

一首

倪小

一首

陸鳳池

二首

毛茂清

三首

項珮

一首

邵斯貞

一首

馮挹芳

一首

徐元端

一首

許心榛

一首

金莊

一首

顧之瓊

一首

曹鑑冰

一首

錢鳳綸 一首

沈珮 一首

許宜娛 一首

袁寒篁 一首

陳敬 一首

葉慧光 一首

程扶娥 二首

徐玉映 二首

許玉晨 四首

胡慎儀 一首

張玉珍 四首

沈纓 三首

沈湘雲 二首

戴陵濤 一首

蓉湖女子 一首

舒霞 一首

方是仙 一首

何月兒 一首

葉宏組 字書城崑山人
有續餘詞草

王素巖云石林居士世仰高風葦竹名儒代
傳清德書城葉太君頌椒語菊抹月批風閒
寄意于填詞積等身之傑作吹簫羸館卽試
新聲挾瑟楊家偏摹舊譜近宗兩宋可登秦
柳之堂上溯三唐幾奪白溫之席

望江南

人別後獨自倚牕紗畫譜嬾圖連理樹繡牀羞刺並頭
花愁思近來加

又

人別後錦字倩誰傳心逐雨花臺上客情牽桃葉渡頭
船終日悶懨懨

浣溪沙

初夏

開遍薔薇小院香乍晴梅雨蝶飛忙一溪新碧浸鴛鴦
古帖午臨欹枕倦瑤琴晚奏短襟涼倚欄遠望又斜
陽

南歌子

寄七姊查夫人眉令

桂殿清香杳桐華夜色浮孤燈門掩有人愁幾點無情
蕉雨滴心頭雁影寒烟樹蛩聲冷翠樓西風迢遞疾
如流吹老蘆花又入髩邊秋

踏莎行

秋閨

寒雁侵吟籬花伴繡蕭疎一派秋時候曲欄倚遍望天
涯斜陽斷處青山瘦屏掩銀牀篆噴金獸芭蕉影壓

疎簾縐那堪月上又黃昏聲聲露滴梧桐漏

浣溪沙 題女史楊倩玉遠山遺集

吹落雙星雁獨歸斷魂殘夢遶花枝西風冷落舊羅幃
黛筆難描索笑影淚珠拋作亂紅飛挑燈讀遍遠山

詞

顧瑤華

字晚芬錢唐人表某室
有自怡草一卷詞附

卜算子 題畫

殘雪壓南枝月上黃昏靜疑是林逋處士家清淺溪邊
影寂寂暗香浮幽意無人省爲占江南最早春耐盡

風霜冷

閔懷英

字晚餘錢唐人方祐俊室有猗香樓吟稿一卷詞附

減字木蘭花

憶杭

春寒驚夢被擁巫雲誰與其望眼迷離粉蝶楊花一片
飛倚闌無力深掩重門人寂寂兒女牽懷目斷西冷
雁不來

郁大山

字靜如青浦人倪某室

柳梢青

秋夜

何處鐘聲誰家笛韻最是多情獨步芳階芭蕉月上影
落疎櫺連朝碧草無螢窗兒外風清月明寶篆拋烟
銀燈無焰倍覺淒清

潘

端

字慎齋青浦人倪永清室

鷓鴣天

瑞腦空燒入夜香
輕風吹恨上羅裳
倚欄無語看明月
暗覺芭蕉影半牆
秋寂寞夜淒涼
偏來愁思惱愁腸
愁腸寸寸因愁絕
又送愁人兩鬢霜

倪

小

字苗姑青浦人陸某室

菩薩蠻

秋夜獨坐

蘭閨幽靜纖塵絕
博山香炷挑燈熱
何處弄哀箏
淒涼獨自聽
銀河清似水
人坐秋聲裏
窗外月華生
粉牆花影明

陸鳳池

青浦人

憶秦娥

杜鵑

東風咽杜鵑
簾外啼紅血
啼紅血一枝竹影半庭殘月
當年幽恨憑誰說
鄉關望斷真淒絕
真淒絕不如歸
去舊時宮闕

雨中花

秋思

滿徑芙蓉紅欲暈
更交映桂芳菊潤
聽幽砌蛩吟疎林
蟬噪惹起清秋恨
每歎流光容易盡
記七夕鵲橋渡
穩早過了中秋
疎風斜雨又是重陽近

毛茂清

字休逸太倉人顧清振室有筠雪軒草

踏莎行

閑裏心情病餘詩酒匆匆寒食清明後柳絲無力綠低
迷花枝有恨紅消瘦 春晚韶光暖風吟袖爐烟不動
湘簾晝夕陽天外亂山多望中又是愁來候

臨江仙

一夜西窗細雨驚心芳事將闌厭厭睡起小屏山斷魂
隨落絮殘夢怯啼鵲 欲問春歸何處空憐花自無言
幾回吟望向風前不堪芳草色爭奈夕陽天

齊天樂

絡緯

碧梧芳信驚初到秋聲晚來無數金井闌邊荳花籬落

做得淒清幾許蕭蕭振羽似一度高吟一番低訴乍斷
還連依稀吹入小窗戶還疑春繭曳緒引秋情暗起
宛轉千縷錦字縈愁哀絃紡夢獨立空堦風露不勝酸
楚共促織鳴悲寒蛩啼苦絮盡新愁夜涼誰共語

項

珮

字吹聆秀水人吳統持室

桃源憶故人

聞外歸

東風似惜離顏瘦不許紗窗輕皺吹得梅芽香透纔是
郎歸候屏山十二春依舊買幅生綃重繡花影雙雙
當晝莫遣離情又

邵斯貞

字靜嫻餘姚人

蜨戀花

春雨三更喧碧沼愁病交侵有夢何曾好枝上鶯啼天
欲曉空庭一夜生芳草何處天涯音信杳紫燕雙飛
偏把幽情惱捲起湘簾風尚悄臨粧嬾把蛾眉掃

馮挹芳

字琴仙長洲人馬
某室有三影樓詞

菩薩蠻

雨窗對菊

繡衣風透餘香纖玲瓏嫩葉凝眸碧花影半簾秋簫聲
起畫樓夜深人獨立風雨蕭蕭急燭灺閃虛櫺疎枝
映素屏

徐元端

字延香
江都人

南鄉子

獨坐數歡期花影重重月影低無計徘徊思好句支頤
除卻春愁沒箇題閒倚畫樓西芳草青青失舊隄猶
記當時人去處依依紅杏花邊颺酒旗

許心榛

字阿泰

菩薩蠻

數聲漁笛斜陽裏離愁生怕寒風起烟樹幾人家冬殘
猶試花昔時歡笑處各自東西去盼到斷鴻飛霜帆
獨棹歸

金莊

字子嚴江寧人王某室

清平樂

淒涼晚色絲雨和愁織夢到楚江行不得一片濕雲空
隔年時曾憶城東杏花點點飛紅門外憑他寒食玉
闌自有春風

顧之瓊

字玉蕊仁和
人錢某室

浪淘沙

風靜綺牕閒一任妝殘晝長何事倚闌干好夢不來來
便去幾度芳年極目楚江寒烟棹平瀾離魂難度萬
重山簾外柳條飛絮也春又闌刪

曹鑑冰

字葦堅嘉善人
有繡餘試硯稿

疎影 雁影

行行點點問誰將
淡墨憑空灑徧雪
壓危橋
月暈閒庭
描寫春愁秋怨
蘆花港淺參差過
還認是掠波歸燕帶
斜陽時近南樓界
出一繩天遠
總使懸鉞垂露只模
糊不辨隸蟲符篆
寫上征衫
落到寒砧可也寄封書便
驚弦任爾高飛起
原依約晴川荒甸
最消魂暮雨朝雲
吹墮平沙難見

錢鳳綸

字雲儀仁和人黃式序室有古香樓詞

眉峰碧

與亞清奕

深院閒春晝
小篆歎金獸
一杯清茗
一枰棋正
杏雨香

飛候 鸚鵡新聲溜
鷺地驚回首無端輸卻玉搔頭倚
屏笑撚花枝嗅

沈

珮字飛霞桐鄉人吳起代室有繡閒殘稿

南鄉子

簾外雪初飄
翠幌香凝火未消
獨坐夜寒人欲倦
迢迢夢斷更殘倍寂寥
樓閣徧瓊瑤
庭樹紛紛玉作條
林外梅花應放也
蕭蕭香到寒溪第幾橋

許宜娛

江州人有問花樓詩餘

柳梢青

寄外

日殘春暮年年拋恨在花間
住一陣東風梨花如雪桃

花如雨 教人沒箇商量容易把韶光放去只恐來時
殷勤問我春歸何處

袁寒篁

江南華亭人有綠窗詞

虞美人

輕寒漸退東風暖漫把湘簾卷眼前
護草不忌憂偏是一絲楊柳一絲愁
年年對景增凄切恨共丁香結不
如掩了碧牕紗一任淡烟微雨送韶華

陳

敬

字端寧號髻儒江南華亭人周誠閑室

畫堂春

送春

呢喃雙燕傍簷飛綠陰搖曳成圍
朝來便覺眼前非初

試羅衣 寶馬香車人散金鈴綵幔花稀年年此際對
斜暉可奈春歸

葉慧光

字妙明南匯
人有疎蘭詞

珍珠簾

孤雁

冥冥萬里呼羣急歎浮生也復漂流南北一點落平沙
認往時蹤跡輾轉驚魂猶未定正雪滿寒灘蘆荻悽惻
待寫怨畱情不成行墨 清影獨占天涯傍瀟湘苦竹
淚痕凝碧天半動哀聲似斷弦瑤瑟十二樓中明月夜
悵舊侶那堪思憶悽絕只孤鶴橫江似曾相識

程夔娥

號蓮邨休寧人蔣璽
室有雙松詞一卷

減蘭 新月

浮雲散盡一絲露出銀塘冷照上妝臺羞染春山弄玉
釵波光透入金仙肯受蝦蟇蝕雁影樓西認作弓彎
不敢飛

桃源憶故人

西窗斗柄驚秋早昨夜玉簪開了蝴蝶不知身老猶戀
花叢繞芳堦吹落王孫草桐葉飄來風掃無限秋心
誰曉添得愁多少

徐玉映

字若冰錢唐人歸長洲孔氏早卒有南樓集詞附

點絳脣 上元後一日

獨倚薰籠舊游誰是關情處霜清月午香雪孤山路

春到吳閭却被東風悞紗牕暮收鐙院宇擁髻蕭蕭雨

采桑子 題畫

仙山樓閣空中住不坐雲車便上靈槎又跨青鸞弄彩霞
蒼苔白石巖扉靜煙水生涯風月年華愛伴雙成
掃落花

許玉晨

字雲清江南華亭人有琴畫樓詞

好事近

春水碧漪漪鷁鷁下來雙浴恰被落紅驚去剩浮蘋新綠
小欄花韻倍嫣然香睡午晴足困倚畫屏深處又

風敲修竹

金縷曲

荅外

晝永何當遣向晴牕開鑪試茗提壺洗硯偏是珍禽檐
間語又喚繡牀針綫誰省識相思人倦幸有牆東櫻桃
樹破東風已覺紅深淺對妝閣作清伴 鳳城多少香
輪輾只閉門一番新雨繡箔凝遍欲倩生花傳幽緒奈
被江郎占斷但夢憶故山清遠遙盼吳淞春波濶恨錦
鱗不寄迴紋轉餘芳淚枕函泣

浣溪沙

翠竹陰深暑半消玉荷池畔暗香飄半規月影上瑤梢

團扇倩人塗蛺蝶畫叉喚婢捲蠅蛸小屏風底換輕綃

菩薩蠻

棗花簾外西風緊玉鳬沉麝餘香燼燈影暗銀缸梧桐
葉打窗此情誰共省淚濕紅巾冷寒雨又淒淒秋蟲
作伴啼

胡慎儀

字山陰人劉秉恬室

滿江紅

題三泖漁莊圖

古渡扁舟橫繫在柳陰深處視西風那湖秋早挂帆歸
去一片斜陽紫岸曲半灣流水沿門住把漁竿獨坐自

國朝詩集卷四
忘機盟鷗鷺 頻領畧烟霞趣
寒夜煖朝還暮趁箕踞
長嘯逍遙寰宇茅屋春深
鶴夢老金爐香裊琴心古
勸垂綸莫漫向衡門棲遲誤

張玉珍

字藍生江南華亭人
金鋤室有得樹樓詞

柳梢青

寒食日作

怕是芳春春寒春困偏易傷人
牆外秋千階前花片靜
掩柴門 新愁觸損眉痕相攬處
吟魂夢魂細篆飄殘
短檠分到又是黃昏

又

寄遠春弟

愁化輕煙了無消處忽墮燈前
豈怨離多應憐別久瘦

到吟肩 夜寒頻數瓊鉞敲不盡迢迢似年木葉飄時
霜鴻過盡難寄紅箋

祝英臺近

病起

雁書沈芳信遠麗句寫紈扇小極無聊睡也幾曾倦縱
有鴻雪行蹤絮泥心事都付與舊時鶯燕 蠟燈泣早
又院落黃昏螢火兩三點曲彙闌干不語苦憑徧倩攜
綠綺輕彈一天離恨任香影回風低卷

憶舊游

寒牕聽雨回憶偕亡妹季蘋挑燈清話感賦

記當時聽雨小閣聯吟正是寒天不盡清游興儘敲碁
門茗何限纏綿漏聲縱催深夜刻燭竟忘眠被一霎西

風平分雁侶隔斷荒烟 情牽片帆遠悵越尾吳頭尺
素茫然碧海珠難合傾芳魂入夢夢也堪憐斷腸暗垂
清淚蘸墨寫雲箋想如寄人生多愁乃爾空少年

沈

纓

字蕙孫長洲人林衍潮
室有翡翠樓詞一卷

蝶戀花

春暮

百五韶光餘幾許輕暖輕寒漸覺芳時暮落盡桃花飛
盡絮闌干凭到無聊處 試聽梁間雙燕子豈解傷春
却作傷春語打疊愁腸千萬縷夜來那更風和雨

菩薩蠻

春日回文懷素芳周姊

落花紅雨春陰薄薄陰春雨紅花落清院一聲鶯鶯啼

一院清 碧波烟靄隔隔靄烟波碧魂斷最黃昏昏黃
最斷魂

點絳脣 春晚和陸素窗姊韻

晝靜簾垂落花滿地鶯無語愁心如許不共春歸去

佇望天涯一帶雲連樹人何處相思寄與分付風前絮

沈湘雲

字綺琴江陰人王氏
青衣有峽水餘音

踏莎行 送春

恰恰鶯啼喃喃燕語商量欲倩東君住荼蘼架外草青
青綠陰如幃遮來處 小夢初醒斜陽易暮微行悄步
看他去一溪花瓣水聲長誰知卽是春歸路

淡黃柳

歸舟咏蟬

寒蟬乍咽橋外停蘭橈一帶江村殘雨歇聽到五更欲
斷淡月蕭疎又秋色這時節夢兒乍成得櫓聲苦響
漏急記烏衣巷柳曾相識捲起孤篷迢迢往事一樹無
情自碧

戴陵濤

字文淑江都人有綠窗草

虞美人

秋山

千林葉落千峰曉颯颯西風早隔山何處逗鐘聲回首
蒼茫雲樹接歸程寒鴻出林深秋後楓葉霜初透停
車晚步望山頭又是一行征雁過秦樓

蓉湖女子

江陰人

畫堂春

長空一碧月華生
秋花褪盡紅英驚
鷺兩兩浴蘭汀
濕浪吹萍
霧氣捲開山色
雲光流出溪聲
湘簾斜捲絲
矚凝人倚銀屏

舒

霞

女尼

臨江仙

舟中作

閒卻此身滄海外
帆輕不計途長
邨邨樹色染秋霜
波漂菰米熟
風送野花香
蓼渚蘆灣何處宿
狎鷗一樣
行藏
十年前事已相忘
只愁今夜夢隨月到家鄉

方是仙

字澹然
吳興妓

女冠子

曉鶯啼罷起來多少愁緒
鉤簾飛絮水流花落銷魂時
節拋人歸去玉鞭門外路
和淚看人更無言語燕釵燭
冷雲鬢花欹倦臨繡戶
愛風流幾許賺人句恨此生
卻似海棠開無主佳期難據
怕魚沉雁杳尋伊何處况
多病多愁怎禁零落這番春
暮空閨今夜夢魂深鎖半
窗烟雨

何月兒

亂仙

鷓鴣天

整束簪環下碧霄教人腸斷念奴嬌出房空剩殘香粉
獨對瀟湘憶翠翹尋別話酌清醪盈盈徐送小紅橋
從今不伴煙霞客愛向風前鬥柳腰

國朝詞綜卷四十八